

Sèn Jan, ai 4 de dezember 2023
COMUNICAT STAMPA

GE FAJON FESTA AI CONSCRIC!

Museo Ladino e Fassa Coop ge fèsc festa ai conscric, anter tradizions neves e da zacan Sabeda ai 9 de dezember, da les 5 domesdi

Ciapie da cordeles, fiores e piumes, gramièi decoré e fianie, fenc e touses con n gran estro de stèr en compagnia e de ge l cridèr al mond: l é ora di conscric!

Tradizions veiores e usanzas neves se lea per zelehrèr tousc e touses che à tanche compì desdot egn ruan coscita te la età adulta. Ma che se sconel pa dovia chi simboi, che volei pa dir per nesc aves e co vegnei pa vivui dai joegn da anchecondi? Zeche l é restà, zeche da auter l é stat desmentià, e zeche se à mudà, regolà con simbologie neves, e l seghita a viver mantegnan n balanzament e metan su tradizions neves per l davegnir.

Per l secondo an la Majon di Fascegn e Fassa Coop Center Coprativa Val de Fascia se met ensema per ge dèr ai conscric n aiegher benvegnù te la sozietà.

En sabeda ai 9 de dezember da les 5 domesdi l Museo Ladin a Sèn Jan tolarà dant fenc e touses de desdot egn per n gustegol confront intergenerazionèl che se dejujarà con jeghes, retrac e testimonianzes anter la usanzas da zacan e cheles che à ciapà pe primò da pech. **Entorn les 18.20** l event jirà inant aló dal **Fassa Coop Ingress** per zelehrèr idealmenter la entrèda di conscric tel mond economich con n picol moment de festa.

La **Coprativa Val de Fascia**, simbol del svilup economich del teritorie, vel ge fèr festa e esser apede i conscric per palesèr la vejinanza de la jent a sie joegn, per ge dèr l benvegnù te la sozietà, per esser soponta te chel che i cernarà per sie davegnir e ge moscèr l valor de la cooperazion.

Ence l Museo Ladin vel encorajèr chisc joegn a ge vardèr con gaisa al davegnir e ge didèr a capir la storia da chela che vegn ca l leam che l li tegn ensema amò anchecondi. Ma l vel ence saer dai conscric coche i vif chesta tradizion e coche, de an en an, sie entujiasm se mola fora e l se palesa. E, soraldut, l vel ence ge fèr a saer che la **Majon di Fascegn**, col Museo, la Biblioteca e l Istitut, l é ence cèsa sia, che la é semper vertia a tor dant duc e che la à debeseegn del entujiasm e del estro de fèr de la generazions neves, ence per fèr n pont staif anter passà e davegnir.

Ve speton donca de n muie en sabeda ai 9 de dezember te Museo Ladin e te Fascia Coop per n **moment de festa, de cultura e de divertiment avert a duta la comunanza e ai ghesc**, per cognoscer la val de Fascia a na moda più sota e sciantiva.

(DB/NC)